

## В СРЕДУ СЫРНУЮ ВЕЧЕРА,

На Господи воззвах, стихиры, яко обычно.

Слава, и ныне, Богородичен.

Прокимен, глас 5:

Прокимен: Боже, во имя Твое спаси мя, и в силе Твоей суди ми.

Стих: Боже, услыши молитву мою, внуши глаголы уст моих.

Пророчества Иоилева чтение. [Глава 3, ст. 12 – 21.]

Так о глаголет Господь: да востанут и въздут вси языцы на юдоль Иосафатову, яко тамо сяду разсудити вся языки яже окрест. Испустите серпы, яко предстоит обимание винограда: внидите, топчите, яко исполнь точило, изливаются подточилия, яко умножишася злобы их. Гласи прогласишася на поли судебнем, яко близ день Господень на юдоли судебней. Солнце и луна померкнут, и звезды скрыют свет свой. Господь же от Сиона воззовет, и от Иерусалима даст глас Свой, и потрясется небо и земля: Господь же пощадит люди Своя, и укрепит [Господь] сыны Израилевы. И увесте, яко аз Господь Бог ваш, вселяся в Сионе в горе Моей святей: и будет Иерусалим свят, и иноплеменницы не пройдут сквозе его ктому. И будет в той день искаплют горы сладость, и холми источат млеко, и вси источники Иудины источат воды, и источник от дому Господня изыдет, и напоит водотечь сития {евр. ситтим} Египет в погибель будет, и Идумеа в поле погибели будет за озлобление сынов Иудиных, понеже пролияша кровь праведную на земли своей. Иудеа же во веки населится, и Иерусалим в роды родов. И възыщу крови их и не обезвиною: и Господь вселится в Сионе.

Прокимен, глас 6:

Прокимен: Да уповае Израиль на Господа, от ныне и до века.

Стих: Господи, не вознесесе сердце мое, ниже вознесостесе очи мои.

И Сподоби Господи в вечер сей:

На стиховне самогласен дне, глас 3:

Возсия весна постная, \* цвет покаяния, \* очистим убо себе братие, \* от всякия скверны, \* Светодавцу поюще рцем: \* слава Тебе, едине Человеколюбче.

Стих: К Тебе возведох очи мои, живущему на небеси. Се яко очи раб в руку господий своих, яко очи рабыни в руку госпожи своя: \* тако очи наши ко Господу Богу нашему, дондеже ущедрит ны.

Возсия весна постная, \* цвет покаяния, \* очистим убо себе братие, \* от всякия скверны, \* Светодавцу поюще рцем: \* слава Тебе, едине Человеколюбче.

Стих 2: Помилуй нас Господи, помилуй нас, яко по многу исполнихомся уничижения: напаче наполнися душа наша поношения гобзующих, \* и уничижения гордых.

И мученичен: Мученицы Твои Господи, \* верою утверждшеса, \* упованием известившеса, \* любовию Креста Твоего душевно соединившеса, \* вражие мучительство разрушиша, \* и улучивше венцы, \* со безплотными молятся о душах наших.

Слава, и ныне, Богородичен:

Первосвятая, Чистая, \* похвала сущи небесных чинов, апостолов пение, \* пророков сбытие, \* Владычице, приими молитвы наша.

Ныне отпушаеши: По Трисвятом, тропарь святому: Слава, и ныне, Богородичен его. Аще несть, тогда тропарь дне. Слава, и ныне, Богородичен, по гласу тропаря.

Ектения: Помилуй нас Боже: Поклоны 3 великия.

Буди имя Господне:

Благословяю Господа:

Достойно есть:

И отпуст.

И исхождение в притвор. И бывает обычная литиа о усопших.

Разумно же да будет, яко в Палестине, еже есть во Иерусалимской стране, не прияхом от святых отец сотворяти совершенныя Литургии в среду и в пяток сырныя недели, ниже преждесвященныя: в та бо два дни поем Аллилуиа с поклоны вечер, и утро, якоже выше речеся.

По Вечерни же, в сих дву днех, ядим сыр и яйца, соблюдающе и правило во святых отца нашего Никифора, патриарха Константинопольскаго, исповедника, глаголюща: подобает поститися монахом в среду, и пяток сыроястный. Отвращает же сие правило предание Иаковитское и тетрадитскую ересь.

В среду сырную вечер. Повечерие поем малое. И поем канон, иже в Минее на ряду, в субботу хотящаго прилучитися святаго.

## **В ЧЕТВЕРТОК СЫРНЫЙ НА УТРЕНИ,**

По 1-м стихословии седальны Осмогласника, апостольския.

По 2-м стихословии седален Троици, глас 5.

Подобен: Собезначальное Слово:

**Ч**етырдесятницу, и предочистительницу, \* апостоли вси днесь венчают, \* и постное время освящают \* у Христа Избавителя, \* и Воскресение Его предвозвещают всем, \* и молятся Господеви, \* помиловатися душам нашим.

Слава, тойже.

И ныне, Богородичен, подобен:

**В** Тебе надежды Дево Чистая, \* несумненно имущим, \* покров сущи от различных искушений, \* и обстояний, и бед лютых свободи я, \* молящи Сына Твоего со апостола Его, \* и спаси вся воспевающия Тя.

Таже чтем слово святаго Анастасиа, игумена Синайския горы, и псалом 50.

Каноны же поем Осмогласника, и Минеи. А в нихже песнях поем трипеснцы, оставляем таковыя песни Осмогласника.

Трипеснец. Творение господина Иосифа, глас 4.

Песнь 4:

**Ирмос: Услыша пророк ...,**

**П**росияша в мире зарю богоразумия ученицы Твои Господи, и прелесть помрачиша прельщения, разорше омрачение. Тех молитвами Щедре, спаси поющия Тя.

**П**реддверия поста, подвигов благоплодии венчанная приемлют притекающих трезвенно песньми и пении таинственными, тщательно вернии вси стеемся.

**У**мерщвления ризы прием, в дерзость невоздержания облекохся окаянный: но Ты мя облецы Сыне Божий, одеждою светлою отрождения.

**Ж**итие мое лукавством, и всякою нечистотою скончася: но к Тебе всецедрому прибегаю, предварив убо спаси мя Христе Боже, Твоею благиною.

**Богородичен: З**ачала еси паче слова, и родила еси паче естества Богородительнице, Владычествующаго тварию. Егоже непрестанно моли, избавитися нам от всякаго гнева, Тебе ублажающим.

Иный. Глас 2:

**Ирмос: Пришел еси от Девы не ходатай, \* ни ангел, \* но Сам Господи воплощься, \* и спасл еси всего мя человека. \* Тем зову Ти: \* слава силе Твоей Господи.**

**Р**асточивше невоздержания мглу апостоли, учений ваших сияньми, просветисте воздержанием вся грешныя и праведныя, яко всехвальнии.

**Я**коже яснии бисерие Слова апостоли, вся украсисте воздержанием концы, и удоботворивше душ наших воистину ныне благородие.

**П**ещь страстей рососою поста апостоли увядивше, вся человеки научисте, град сей некрадомый и жилище имети освящения.

**Слава:** Согреших паче всех человеков окаянный, и не покаяхся, яко Манассиа согреших: нравы покаяния ми сотвори Господи, прежде даже не разрешит мя смерть.

**Богородичен:** Тебе пристанище спасения, и стену нерушимую Богородице Владычице, вси вернии ведем: Ты бо молитвами Твоими от бед свободяеши души наша.

**Таже, ирмос:** Пришел еси от Девы не ходатай, \* ни ангел, \* но Сам Господи воплощься, \* и спасл еси всего мя человека. \* Тем зову Ти: \* слава силе Твоей Господи.

### Песнь 8:

**Ирмос:** Всяческая Владыко ...,

**З**емля вся Господи, Твоего хваления исполнися: всю бо обтече божественных ученик Твоих вещание божественное, из глубины неведения обращающее к разуму, поющую: благословите дела Господня Господа.

**Б**лагодать Божественная покаяния явися, спасение носящи, сея наслаждающимся, побед и подвигов, потов и болезней: темже тецы душе моя ко Владыце твоему, многих твоих прегрешений ищущи прияти прощение.

**П**оприще отверзся богоданного воздержания, светло усрящем требующии милости: жаждет бо Благоутробный нашего спасения, и еже дати прощение простирается, ищущим Его усердно, и любовию работающим.

**П**остом заустися, мирствующею мыслию, напитай же душе Господа, благодеянием добродетели, брашна, яко благовонныя жертвы, приносящи Сему, и взывающи: дела благословите непрестанно Господа.

**Богородичен:** Всеми владычествующая, мольбы приемающи Владычице рабов Твоих, святая Богородице, тьмы мя избави и огня негасимаго, зол моих множества очищающи Твоим ходатайством, и единою божественною Твоею молитвою.

### Иный.

**Ирмос:** Устрашися отроков благочестивых, \* сообразнаго души несквернаго тела, \* и устранися воспитанный \* в безмерном веществе, неутружден огонь: \* присноживущу же, \* изувядшу пламеню, вечнующая песнь воспевашеся: \* Господа вся дела пойте, \* и превозносите во вся веки.

**В**ас якоже свет, Христос, в концы вся вселенная апостолы давый, шедше, рече, научите во языцех: да в плоти Мя суца увидите воздержанием живуща, и вражию всю силу попирающа, и путь человеком являюща правый.

**Я**вил еси грядущее Христе воздержание, во очищение человеком, страстей же отлучение: сим бо Твои апостолы благоугодиша, и светлии светильницы на земли явишася, проповедающе Господа в трех Лицах, во едином же Существо, всем воспевающим Его.

**Я**зыком проповедницы вы послани бысте от Учителя Христа, о ученицы, ученьми Божественными просвещати их помышления, страстей же и брашен удержаватися, желати же воздержания, и Господа знати Сего, и Создателя, и Творца всех и Благодетеля.

**Благословим Отца, и Сына, и Святаго Духа, Господа.**

**Якоже** иногда Каин убийца, не принесох души моея жертву непорочную Христе, нечистым разумом содержимь. Не возгнушайся мене приходяща к Тебе постом Спасе Преплагий, но призри на дары, яже любовию несущу Тебе Боже мой, во время пощения.

**Богородичен:** Блаженное бысть чрево Богоматере, яко приемшее Слово, дебельством плоти от Нея смесившееся человеческому зраку, по ипостаси: и явился град Божий, в немже жити Вышний благоволи, и Господь Бог. Темже вопиешу Ти: радуйся благодатная, Чистая Богородице.

**Хвалим, благословим, покланяемся Господеви:**

**Ирмос:** Устрашися отроков благочестивых, \* сообразнаго души несквернаго тела, \* и устранися воспитанный \* в безмерном веществе, неутружден огнь: \* присноживущу же, \* изувядшу пламеню, вечнующая песнь воспевашеся: \* Господа вся дела пойте, \* и превозносите во вся веки.

**И стихословится Честнейшую:**

**Песнь 9:**

**Ирмос:** Яко сотвори мне ...,

**Яко** пламень миру послани бысте нелестный, избавляюще глубины грехов: воспеваем радостию Укрепившаго вас, яко апостолы Своя.

**Яко** вас миру объюродевшу, древле Христос яко соль посла мудрии, вразумляющия его к познанию Своему, восхваляем верно.

**Яко** множество прегрешений обдержит мя лютых, со слезами припадаю Ти Христе, прощения прося, благовремение ми подати во время поста.

**Яко** веригами нерешимыми связан моих страстей, стеною и взываю Ти Спасе: свободи мя, яко да пою прерадованно благоутробие Твое.

**Богородичен:** Яко показа Тя Бог, Дево Чистая, помощь роду человеческому, не престай прилежно молящи Его о нас верных.

**Иный.**

**Ирмос:** Невместимаго Бога, \* во чреве вместившая, \* и радость миру родившая, \* Тя поем Богородице Дево.

**Апостолов** лик пост показа, вселенней всей возсияющий, и светлостью Божественною просвещающий мир.

**Ученик** Твоих Иисусе лик Человеколюбче, языческия роды научи, воздержания сокровиществовати богатство.

**Дванадцатострунное** вещание ученик Твоих состояние, воздержания богатство дарствует человеком, и источник спасения.

**Слава:** Блуднаго Ти гласом взываю Господи: Отче, согреших, спаси Щедре, да не славы Твоя отлучиши мя.

**Богородичен:** Во чреве Твоем Бога яко Человека поносившая, и живот миру источившая, Тя воспеваем Всесвятая Дево.

**Ирмос:** Невместимаго Бога, \* во чреве вместившая, \* и радость миру родившая, \* Тя поем Богородице Дево.

## Светилен гласа.

### На стиховне же поем самогласен дне, глас 3:

**Возсия** воздержания благолешие, \* бесовскую мглу отгонящее: \* прииде постная лепота, \* душевных страстей исцеление носящая. \* Сею иногда Даниил, и в Вавилоне отроцы ограждени, \* ов убо уста львов обузда, \* овии же пламень пещный угасиша. \* С нимиже и нас тоюжде спаси Христе Боже, \* яко Человеколюбец.

**Стих 1:** Исполнихомся заутра милости Твоя Господи, и возрадовахомся, и возвеселихомся: во вся дни наша возвеселихомся, за дни в няже смирил ны еси, лета в няже видехом злая. \* И призри на рабы Твоя, и на дела Твоя, и настави сыны их.

**Возсия** воздержания благолешие, \* бесовскую мглу отгонящее: \* прииде постная лепота, \* душевных страстей исцеление носящая. \* Сею иногда Даниил, и в Вавилоне отроцы ограждени, \* ов убо уста львов обузда, \* овии же пламень пещный угасиша. \* С нимиже и нас тоюжде спаси Христе Боже, \* яко Человеколюбец

**Стих 2:** И буди светлость Господа Бога нашего на нас, и дела рук наших исправи на нас, \* и дело рук наших исправи.

**И мученичен:** Яко светила в мире сияете, \* и по смерти святии мученицы, \* подвигом добрым подвигшеся. \* Имуще дерзновение, \* Христа умолите, \* помиловатися душам нашим.

### Слава, и ныне, Богородичен:

**В** женах святая Богородице, \* Мати безневестная, \* моли Егоже родила еси \* Царя и Бога, \* да спасет ны яко Человеколюбец.

**Таже:** Благо есть исповедатися Господеви, и пети имени Твоему, Вышнии, возвещати заутра милость Твою, и истину Твою на всяку ночь.

**Трисвятое.** И Отче наш:

### И тропарь:

**В** церкви стояще славы Твоя, на Небеси стояти мнимся, Богородице дверь Небесная, отверзи нам двери милости Твоя.

Господи помилуй, 40.

**Слава, и ныне:** Честнейшую херувим:

Именем Господним благослови отче.

**Иерей:** Сый благословен Христос Бог наш, всегда ныне и присно, и во веки веков, аминь.

**И молитву:** Небесный Царю, \* веру утверди, \* языки укроти, \* мир умири, \* святыи храм сей добре сохрани, \* прежде отшедшия отцы и братию нашу \* в селениих праведных учини, \* и нас в покаянии и исповедании приими, \* яко Благий и Человеколюбец.

**И творим три поклоны великия, и глаголем молитву  
преподонаго ефрема сирина:**

Господи и владыко живота моего, дух праздности уныния, любоначалия, и празднословия не даждь ми.

Дух же целомудрия, смиренномудрия, терпения, и любви, даруй ми рабу твоему.

Ей господи царю, даруй ми зрети моя прегрешения, и не осуждати брата моего, яко благословен еси во веки веков, аминь.

Малые Поклоны: 12.

Паки скончавше поклоны, глаголем молитву вышписанную Господи и Владыко живота моего: и поклон един великий.

Совокупаем же и час 1, яко обычно. И отпуст.